

بِسْمِ اللَّهِ الرَّحْمَنِ الرَّحِيمِ

Khutba Jummah

HAZRAT MUHYI-UD-DIN AL-KHALIFATULLAH

Munir Ahmad Azim

17 Juin 2016 ~
(11 Ramadhan 1437 Hijri)

(Résumé Khutba)

Après ki li fine salué tous so bane disciples (et tous bane musulmans) entier le monde avec la salutation de paix dans l'Islam, Hazrat Muhyi-ud-Din (atba) fine lire Tashahhud, Ta'uz, Surah Al Fatiha, et li fine ensuite dire:

RAPPROCHEMENT AVEC ALLAH & LA RÉCONCILIATION

Mo pé conseille le Jamaat, kot, kot mo la voix pé aller et kot le Jamaat pé tanne sa message là, bizin garde spécialement en vue le progrès de l'unité, de l'harmonie d'accorité. Et dans sa contexte là, le premier pas ki bizin faire c'est ki entre sa vendredi là et lotte vendredi ou bizin réconcilier et faire la paix avec bane dimounes ki ou ti gagne la guerre pour bane zaffaires mondaines, pour bane zaffaires d'égoïsme, pour bane zaffaires personnelles. Ou bizin faire la paix avec sa bane dimounes là. Et personne pas bizin penser ki « c'est moi ki victime, alor c'est lotte là ki bizin faire la paix avant. »

Au contraire li plus nécessaire pour victime là même faire sa réconciliation là avant parski ena promesse d'ene très grand récompense pour celui ki faire sa premier pas là. Et li pour ene très grand malchance ki ene dimoune li victime et c'est oppresseur là ki gagne tout récompense en faisant le premier pas. Sa c'est ene conseil et message ki bizin alle dans zoreille de sak membre du Jamaat entier le monde, et li pas facile pour propage sa conseil là partout et li possible ki sa c'est ene tel conseil ki nous pour bizin répéter plusieurs fois et après sa le conseil ki mo donne zot, ki Allah (swt) fine donne zot l'occasion dans sa mois béni là, kot zot bizin tire profit du mois béni de Ramadhan.

Dans sa mois là, ena bane l'occasion spéciale pour ki ou bane *duahs* accepter. Allah (swt) écoute *duahs* de bane *Rozédaar* (bane ki garde *Roza*) spécialement dans sa bane jours de Ramadhan là. Si nous dire ki Allah (swt) ena ene relation spéciale avec sa bane jours béni de Ramadhan là, li ene affront mais péna aucaine doute là-dans ki Li fine faire bane tel chemins pour So bane créatures dans lequel Li faire faveurs lor zot. A travers sa Li capave éveille bane ki ti pé dormi afin ki zot conner ki si entier l'année zot pas fine faire nannié, au moin dans sa mois là zot capave tire bane profits spirituel.

Azordi zour, bane tipti tipti zenfants aussi persister pour reste *Roza* et *Roza* là pas *Farz*, pas obligatoire pour zot. Au contraire bane zenfants ki capave ene ou deux fois même zot lire Namaz dans ene l'année mais zot bien enthousiaste pour reste *Roza*. Quoique ki dans sa sens là li capave profitable pour zot ki zot capave commence gagne l'habitude supporte la faim. Mais *Roza* li pas fine vini pour faire ene dimoune reste sans manger. Au contraire c'est pour ki ou gagne ene contrôle lor ou l'âme, et ou faire *Ibaadat* Allah et pour ki l'attention de bane dimounes attirer vers Li (Allah). Mais celui ki lever, li faire *Sehri* et li rédormi, bé ki *Roza* ena pour ene dimoune coumsa ? Mo fine trouver ki ena sa maladie là parmi bane madames de nos jours. Dans *Roza* zot faire moins l'adoration d'Allah et zot porte plisse l'attention lor manger et boire. Ena ene innovation ki fine prend de plus en plus envergure, ena quelques l'années mo pé trouve sa, c'est « *Iftaar Party* ». Kot sa sorti sa, pas conné !

Sans aucaine doute, mo conné ki sa li forme partie dans bane devoirs de bane madames ki zot faire arrangement pour prépare bane manger pour zot la caze, pour zot la famille et surtout bane ki pas ena servantes, zot même pé bizin mette la main à la pâte et prépare tout. Mais bizin faire bane tels arrangement afin ki zot pas dépense plus létemps dans prépare *Sehri* mais zot bizin engager à faire le Namaz aussi. Bane missiés aussi faudé pas mette tellement l'attention lor manger etc. et kot alor de sa façon là zot prive zot madame de sa faveurs de l'adoration là. Li possible ki ena ene bane madames ti pour content passe sa bane létemps là dans *Ibaadat* mais zot mari faire ene tel traitement avec zot ki zot peur et lera zot passe plisse létemps à occupe manger ou soi à faire manger vine pli bon.

Donc, ene l'appel ki mo faire ki bane madames et bane missiés bizin faire beaucoup *Ibaadat* dans sa bane jours là et bane ki malade ou ki en voyage ou bien ki pas capave garde *Roza* pour ene lotte raison, zot bizin profite le mois béni de Ramadhan beaucoup. Zot pas capave garde *Roza*, mais zot capave lever pour le Namaz Tahajjud, faire le *Telawat-e-Quran*, donne beaucoup *Sadqua* et faire beaucoup de *duahs* et bane Namaz Nafils aussi. Au contraire si sa bane dimounes là ena sa remord sincère là dans le cœur ki zot pas pé capave reste *Roza*, bé zot capave compté parmi bane *Rozédaar* même !

Ene fois Hazrat Muhammad (saws) ti pé alle faire *Jihad* (pendant Bataille de Tabouk), et li fine dire à so bane compagnons ki ena bane dimounes dans Madina ki ensam avec zot pé

participe dans sa *Jihad* là. Alor bane Sahaba fine demander : « Ô prophète d'Allah, comment li possible sa ? Nous ki pé faire face à tout sa bane difficultés là et bane ki pé assisé dans zot la caze, zot pé gagne bénédictions ensam avec nous ? » Hazrat Muhammad (saws) fine dire : « Zot pas fine vine avec nous, pas à coze zot paresse ou bien zot négligence ou quique manquement. Non. Mais parski zot ena bane contraintes et li pas dans zot capacité pour évite sa bane contraintes là ; li en dehors de zot contrôle. Et (alor) ki sa pas cause ou aucaine la peine ki zot pas are ou. Au contraire péna ene vallée à travers lequel ou pé marcher et qui zot (c'est-à-dire, sa bane dimounes de Madina là) pas are ou. »

Donc, ene dimoune ki à cause ene raison valable, li pas capave participe dans *Ibaadat* et li ena remord dans so lécoeur, li pour gagne même bénédictions ki sa dimoune ki pé faire *Ibaadat* là. Sa bane kalité dimounes là pas bizin peur parski si pour ene raison valable, ene dimoune pas capave reste *Roza*, mais li chagrin pour sa, Allah pas faire li perdi dans aucaine de sa bane bons actions là parski so l'intention et so lécoeur pur. Li envie mais li pas capave, et alor Allah accorde sa dimoune là même récompense avec celui ki faire bon action Allah et ki Allah accepter sa bon action ou *Ibaadat* là.

Alor, nous faire *duah* ki dans tout nous bane bons actions et *Ibaadat*, ena ene bon l'intention et faudé aussi nous ena l'amour pour faire sa bane bons actions et *Ibaadat* là, parski c'est dans sa l'amour là, si arriver nous pas fine capave fer li ki Allah pou récompense nous. Allah content So bane serviteurs ki content Li et ki faire zéffore pour faire Li plaisir. Ki Allah compte nous toujours parmi So bane serviteurs élus et ki nous accède à So présence avec So l'amour et en paix et harmonie avec nous-mêmes, avec nous propre conscience. *Ameen*.